



KENYATAAN MEDIA

UNTUK SIARAN SEGERA

PTPTN PRIHATIN HULUR BANTUAN DAN SUMBANGAN KEPADA MANGSA BANJIR

1. Perbadanan Tabung Pendidikan Tinggi Nasional (PTPTN) sentiasa prihatin dan proaktif menghulurkan bantuan serta sumbangan melalui program tanggungjawab sosial korporat (CSR) dalam usaha meningkatkan kesejahteraan masyarakat dan membantu masyarakat Malaysia yang memerlukan.
2. Seperti sedia maklum, ketika ini negara kita berdepan dengan situasi bencana banjir yang mengakibatkan kemusnahan serta kerosakan rumah dan harta benda. Fenomena banjir yang mencemaskan berlaku di negeri Selangor, Wilayah Persekutuan Kuala Lumpur dan beberapa negeri di Pantai Timur.
3. Sebagai sebuah agensi di bawah Kementerian Pengajian Tinggi (KPT) yang cakna dan prihatin dengan situasi bencana yang melanda negara, PTPTN melalui **Program PTPTN Prihatin: Misi Bantuan Banjir Skuad PTPTN Prihatin** terpanggil membantu mangsa-mangsa yang terlibat dengan bencana banjir dan komited menyalurkan bantuan serta sumbangan yang sewajarnya.
4. PTPTN telah bekerjasama dengan **Pertubuhan Bukan Kerajaan (NGO) DANA KITA** yang membantu mengurus dan menyelaraskan bantuan serta barangan sumbangan kepada mangsa-mangsa banjir yang terlibat. Pengagihan bantuan serta sumbangan adalah berdasarkan kepada kelulusan pihak yang berkaitan serta selaras dengan panduan Prosedur Operasi Standard (SOP) yang telah ditetapkan.

5. Kali ini, PTPTN **menghulurkan bantuan dan sumbangan kepada lebih 1,000 mangsa banjir yang terjejas**. Setiap keluarga akan menerima sumbangan **kit bantuan banjir** berbentuk pemberian barangan keperluan harian dan makanan. Selain itu, PTPTN turut turun padang membantu mangsa membersihkan rumah kediaman masing-masing yang terjejas teruk akibat banjir yang melanda.

6. Skwad PTPTN Prihatin dan sukarelawan DANA KITA pada 20 Disember 2021 telah bergerak untuk menghulurkan sumbangan kit bantuan banjir kepada mangsa di Wilayah Persekutuan Kuala Lumpur dan Selangor melibatkan dua (2) buah Pusat Pemindahan Sementara (PPS). Penyampaian sumbangan di Pusat Pemindahan Sementara (PPS) Sekolah Jenis Kebangsaan (Tamil) Saraswathy, Jalan Klang Lama telah disampaikan oleh YBhg. Datuk Wan Saiful Wan Jan, Pengerusi PTPTN. Turut hadir adalah Encik Ahmad Dasuki Abdul Majid, Ketua Eksekutif PTPTN dan Puan Wan Zawiah Wan Abu Bakar, Pengurus Besar Kanan, PTPTN.

7. Manakala pemberian sumbangan di Pusat Pemindahan Sementara (PPS) Sekolah Kebangsaan Sungai Serai, Hulu Langat telah disampaikan oleh Puan Hajah Rohani Datuk Hj Mohd Shahir, Lembaga Pengurusan PTPTN. Turut hadir adalah Puan Mastura Mohd Khalid, Ketua Pegawai Operasi, PTPTN. Seterusnya Skwad PTPTN Prihatin serta sukarelawan DANA KITA akan bergerak untuk membantu mangsa-mangsa banjir di lain-lain lokasi dan negeri termasuk di negeri Pahang, Terengganu dan Kelantan.

8. Sesungguhnya, PTPTN sentiasa prihatin serta menyokong usaha kerajaan dalam membantu menghulurkan bantuan dan sumbangan kepada mangsa-mangsa banjir yang memerlukan. Sumbangan ini juga sebagai tanda keprihatinan PTPTN terhadap golongan yang memerlukan. Semoga dengan sumbangan PTPTN ini dapat meringankan beban kesusahan dan emosi yang ditanggung oleh mangsa banjir yang terlibat. Dalam suasana yang mencabar, PTPTN sentiasa optimis membantu masyarakat Malaysia yang memerlukan bertepatan dengan konsep 'Keluarga Malaysia' melalui program-program CSR yang dilaksanakan.

Perbadanan Tabung Pendidikan Tinggi Nasional (PTPTN)

22 Disember 2021